

# Er ils liberals grischuns han ussa lur istorgia

Hansmartin Schmid preschenta tant il moviment sco la partida politica

■ (anr/gc) L'istorgia dad ina partida chantunala è mintgamai er in pau quella dal Grischun. Quai han las partidas politics dal Grischun adina puspè documentà ed i sa mussa danovamain en la «Istorgia dal liberalissem e dals liberals en il Grischun», da Hansmartin Schmid, cumparida quest atun en la Chasa editura da la «Südostschweiz». L'autur è vegnì enconuschent sco versà correspondent da pliras gasettas, dal Grischun per la Televisiun Svizra ed autur da diversas publicaziuns. Oz è el redactor dal «Bündner Tagblatt». Sco titel per l'istorgia dals liberals grischuns citescha l'autur Florian Dengel. Lez aveva terminà 1868 ses artitgel inzial en il «Rätier» cun ils plets: «Nichts mehr von dahinten – DAVORN!». Tenor lez era il Grischun en il stadi federal svizzer da 1848 betg pli il davos sin il plaun spiertal e politic, mabain davantiers. Quella devisa – sa chapescha sco merit dals liberals – sa tira sco in fil cotschen tras l'entira ovra. Ella enserra blers detagls caracterisants e tipics pertutgant fatgs e persunas, colliads cun il moviment liberal e la partida respectiva en noss chantun. Ses svilup durant na main che dus tschientaners – e ses si e giu – è vegnì inizià da gronds predecessurs e purtà dad impurtantas famiglias dad observanza liberala. La preschentaziun dals liberals e lur politica – cun als metter adina puspè visavi las autras partidas grischunas – dat a quella ovra gronda valita istorica generala ed invista en la politica grischuna insumma.

## Dominà ditg la scena politica er en il Grischun

Ina gronda personalitad liberala e promotur da la refurma politica en quella direcziun è Peter Conradin von Planta stà – sco politicher, historicist, giurist e fundatur e redactor da la gasetta liberala «Der freie Rätier» 1843 ed er autur dad ina «Istorgia dal Grischun». Sia influenza en tut ses auts uffizis sin la reorganisaziun politica dal Grischun – cun la constituiziun da 1854 – è stada considerabla. Allegadas vegnan era la rolla e l'influenza da las famiglias liberalas en la Surselva (Latour, Arpagaus, Steinhäuser) e lur operar politic.

Ils liberals dominavan – sco en Svizra da lez temp insumma – era la politica grischuna. En il cussegl grond occupavan els la segunda mesadad dal 19. e ditg anc el 20. tschientaner la pluralitad dals mandats, medemamain en la regenza sco era en il parlament federal, là per temp schizunt tuts. L'Uniun politica da Cuira è stada la predecessura da la Partida liberala grischuna 1873. En connex cun las refurmas constituiziunalas – vers la fin dal 19. tschientaner – han conservativs refurmads e catolics furmà l'allianza federala-democratica. Dapi 1877 – cun l'entrada da Caspar Decurtins en la politica – è er il conservatissim sa rinforzà e la fin dal liberalissem en Surselva arrivada. 1878 vegn – cun Simon Bavier – l'emprim liberal grischun elegì en il cussegl federal. 1891 vegn furmà a Cuira l'uniun liberal-radical-democratica. Quai è l'ura da naschientscha da la Partida liberala. Sut l'egida dal posteriur cuss. fed. Felix



L'autur Hansmartin Schmid, Myriam Engler da la chasa editura Südostschweiz ed il president da partida, Christian Rathgeb (da sanester) a chaschun da la preschentaziun dal cudesch davart ils liberals grischuns.

FOTO N. SIMMEN

Calonder consolidescha la Partida liberala sia posiziun sco la pli ferma gruppaziun politica grischuna. Dapi 1914 è mai pli in conservativ refurmà vegnì elegì en il parlament federal. I deva alur be pli in cusseglier dals stans catolic-conservativ ed in protestant-liberal.

## Ils liberals perdan influenza e mandats als democrats

Grevas consequenzas per ils liberals han il naufragi da las Ovas electricas grischunas e la dumonda sociala gi.

1919 sa spartan ils giuvens liberals da la gronda famiglia liberala e fundeschan la Partida democratica dal Grischun, daventond uschia concurrents en la arena politica. Quai ha effectuà per ditg ina alianza tranter liberals e conservativs. Lezs furmavan dapi 1903 in'atgna partida ed eran pli baud lur adversaris. Cun ils democrats va i spert ensivers – ed adina sin cust dals liberals. Uschia perdan ils liberals 1925 in mandat en il cussegl nazional als democrats, 1935 lur mandat en il cussegl

dals chantuns ed in segund en il cussegl nazional. Dapi alur han ils liberals be pli in represchentant en il cussegl nazional e mai pli gi in cusseglier dals stans. 1941 acquistan ils democrats schizunt in segund mandat en la regenza. Dapi lu èn ils liberals mo pli represchentads cun in magistrat en il guvern grischun.

Da quel temp hai dà ina ferma confessionalisaziun en il Grischun – principalmain tranter conservativs e democrats, che levan per tut pretsch sigliantar l'allianza conservativ-liberala. Ins discurreva era da novs scumbigls grischuns u dal segund cumbat culturian. 1974 perdan ils liberals lur gasetta «Freier Rätier» sunter 130 onns. En il Grischun ha quella partida gi da 1919 fin oz tranter 55 e 34 deputads en il cussegl grond e sia cumpart vid l'electorat è ida enavos en quel interval da 42 sin anc 16 pertschient.

## Facit e situaziun actuala

La Partida liberala è stada in factur stabilisant en il Grischun. Ella n'è betg pli – sco a la fin dal 19. ed a l'entschatta dal 20. tschientaner – la forza politica dominante en il Grischun. Ma ella è anc qua e parta ussa la turta politica cun las autras duas partidas burgaisas cantunales (pps e pcd). L'autur ha descrit e documentà bain il svilup, la posiziun, prestaziun e contribuziun considerabla da quella veglia partida al bainstar politic dal Grischun. Ils liberals pon savair bun grau per quella zunt infurmativa publicaziun ch'è era dad interess per l'entir chantun.